

Kigin Tawpna

Thusuo - February 23, 2023

Baan Phu Waan, Bangkok Archdiocesete Pastoral Training

Centre ah Asia Gamkaipi huop a Asian Continental Assembly on Synodality

Kikupna, February 24 a pat February 26, 2023 tan a kimang ahita hi. Tana tomun

luo dingteng ahileh Bishopte Kipawlna 17 pan ahi dinga, tualeh Bishopte Synod 2

leh gam 29 sunga Federation of Asian

Bishops Conference (FABC) sunga pangte ahi ding uhi.

Tami kikupna a thutan ding ahileh Cardinal 6,

Archbishop 5, Bishop 18, siempu 28, ngahnu siengthote 4 leh mipite 19 apang

ding uhi.

Asia Gamkaipi ahileh, leitunga mi tamna pen ahia,

vangphatna toh tawndan tuomtuom zui, ham tuomtuom ham, zat leh nam tuomtuom leh

biehna tuomtuom zui atam mama hi. Hitama lezong, Khristian Pawlpite pen Asia

Gamkaipi ah atawm mama a, hinanleh tam gamkaipi a tawndan tuomtuom in pawlpi

ahalsah jel veve hi. Biehna tuomtuom ahisihleh, tawndan tuomtuom leh ham

tuomtuom kizui tama lezong, Asia Gamkai mite pen akipawl thei mama ua, hichi'n

Asia mite akipumkhat thei veve uhi. Asia mite in Pasian aphawh thei mama ua,

khat leh khat akiphawh, akikawm ua, innkuon khat in aom thei veve uhi.

Hasatna tam tama lezong, Zawkhawmna (Synodal journey)

pen pawlpi dingin hamphatna leh Pasian vang muna khat inzong ahing pieng hi.

Pawlpi hi 'puonbuh' toh tethei ahia, michin namchin in abel thei puonbuh khat

ahing suoh hi. Hichi'n tami 'puonbuh neuno' khu kehlet ding angaia, huoi thei chinteng huoi ding ahi. Pasion in ama deina mun ah tami puonbuh atung thei ahi tualeh Hagau in tanah tung un achina mun a itun ding uh ahi. Tami puonbuh hi adiehdieh a, buoina, zauna, gentheina mun a tun ding angai hi. Tam puonbuh ah mi josie akita hi, alut thei a, koima aki pampaisih hi. Tam puonbuh pen mi josie tuntheina inn ahi. Masanglaia, kipampaite tu'n tam inn ah akivaidot hi. Tam in hi, inn siengtho ahia, bitna inn ahi tualeh jatat huoi inn khat ahi.

Pawlpi khu puonbuh toh akite a, Jesu nasan inzong ama puonbuh eite lah ah ahing tung hi. Mihing ahing suona enlei, a puonbuh eite lah a hing lam toh kibang ahia, ama tunsu puonbuh pen Pasion leh mihing kimuotuo inn ahing suohta hi. Mi josie inn ahia, tam inn ah innkuon khat ihina uh ahing kichien hi. Innkuon khat ihina uh pen Tuisawpna itan chiet jieh uh ahi. Synodal Kikupna ichi uh 'Zawkhawmna' kikupna ahia, tuhun laitah a sil poimaw khat ahi. Tulai tah a izawkhawmna uhi, pum khat sa khat isuo thei nading ua zawkhawm ihi uhi. Pawlpi hi lam zuon zing ahia, ahing zing, akhangto zing pawlpi ahi.

Tami zawkhawmna kikupna a lawchin nadingin, thului dingteng akigiel jota a, tana kigiel josie aki zui dimdiem dinga, kikupna a hing pangte'n thutanna anei ding uhi. Kikupna, ngaidan hawmtuona leh kikupna thupi tah in akimang dinga, atawpna ah tamteng guongal vai chi in thu atan ding uhi. Ahing tung ding ni thum sung in panmun luotengin tami zawkhawmna ah bang tan kipahna itang uoi, izawkhawmna pan bang noptomna pawlpi in amu e tualeh bang hasatna leh liemna ituoh uoi chi'n akikum ding uhi. Atawpna ah bang lampi tha zuileh ahoi diei chi inzong akikum ding uhi. Tuatham loh in Asia Gamkaipi in bang buoina leh hasatna atuoh ei chi'n aki kum ding uhi. Thului phasa khat

ahileh tami zawkhawmna bang chi bangin izui ding uoi, thutanna bang chi banga lah ding e, siempu suona dinmun bang tan in iding uoi, khangnote dinmun bang achi ei, mizawngte dinmun bang tan atung ei tualeh biehna toh kisaia buoinate bang chi bang in isang uoi tualeh atawpna ah siempute'n thu anei val uh, bang law ding e chi'n akikum ding uhi.

Hagau Siengtho Mass kichi Mass Siengtho aki nei dinga

tami Mass ah Archbishop Tarcisio Isao Kikuchi, SVD in lamkaina anei ding hi. Ama hi Tokyo Khuopi, Japan a Archbishoppa ahi. FABC a General Secretary inzong apang hi. Mass jo in khat leh khat kitheituona hun aom dinga, ahing pang josie kungah tup leh dawi tualeh panmun lah dingdan akihil ding uhi. Thutanna josie akigiel sieng dinga, ahing pang josie in laidal in amu ding ua, asim ding ua, ngaidan akum ding uhi.

Tami kikapna a hangaih thupi pen ahileh, tam Gamkaipi ah zawkhawm vai chi thu ahi.